

G E N E S I S.

C H A P T E R I.

WAHYASHKUD Keshamunedoo ooge oozhetoon ewh ishpeming, kiya ewh ahkeh.

2 Kah dush mahsgeh wahwanahkahmegezesegahda-senoogoobun ewh ahkeh, kiya kah mahsgeh kagoo ah-yahsenoogoobun, kiya pesahkeeshkahgoobun emah wahgedahbeeg. Keshamunedoo dush Oojechogwun kemah-mahjenewun emah wahgedahbeeg.

3 ¶ Keshamunedoo dush keekedooh, Tahgah, tahwah-sayah : me dush goo kewahsayahnig.

4 Keshamunedoo dush ooge menahwenon ewh wahsayah : Keshamunedoo dush ooge nanahwenon ewh wahsayah, kiya ewh pasahkeeshkog.

5 Kezhik dush ooge ezenekahdon owh Keshamunedoo ewh wahsayah, Tebik dush ween ooge ezenekahdon ewh pasahkeeshkog. Kahoonagooshig dush kiya kah-gahgezhabahwahguk, me ewh netum kegezhieguk.

6 ¶ Keshamunedoo dush keekedooh, Tahgah tahmeshah kezhegookah nesahwahyeeeh emah nebeeng, che-nanahweahyog dush enewh nebeen.

7 Keshamunedoo dush ooge oozhetoon ewh meshah kezhik, kenanahwenung dush enewh nebeen ahnahmhyeeeh emah meshah kezhegoong ayahgin kiya enewh oogejahyeeeh ayahgin : me dush goo ewh kahezhewabuk.

8 Ishpeming dush ooge ezenekahdon owh Keshamunedoo ewh ineshah kezhik. Kahoonahgooshig dush kiya kahgahgezhabahwahguk, me ewh neenzhing kegezhieguk.

9 ¶ Keshamunedoo dush keekedooh, Taangah enewh nebeen nesahwahyeeeh emah meshah kezhegoong ayahgin, pazhegwahnoong tahnahmundoogahmesawun, kiya

dush tahlenahgwud ewh pahyaingwahkahmegog *ahkeh*: me dush goo ewh kahezhewabuk.

10 Ahkeh dush ooge ezenekahdon owh Keshamunedoo ewh pahyaingookahmegog *ahkeh*; Kechegahmeen dush ween ooge ezenekahdahnun enewh kemahmah-wundoogahmesanig enewh nebeen : Keshamunedoo dush ooge menahwenon.

11 Keshamunedoo dush keekedooh, Tahgah ewh ahkeh oogahzahgahketoon ewh manzhusk, chemenewung enewh nwahkashkahkin, *kiya* egewh mahnewejig metigoog chene ezhe mahmenewewod ewh azhe metigoowewod, ewh aindahswayahgezewod emah ahkeeng : me dush goo ewh kahezhewabuk.

12 Ewh dush ahkeh ooge zahgahketoon ewh manzhusk keezhemenebung dash enewh nwahkahshkahkin ewh aindahswayahging, *kiya* owh metig keezhemenewid, ewh aindahswayahgezewod : ooge menahwenon dush owh Keshamunedoo.

13 Kahoonahgooshig dush, *kiya* kahgahgezhabahwahguk, me ewh kenesooh kezheguk.

14 ¶ Keshamunedoo dush keekedooh, Tahgah tahayhwun Kawahsahkoonagin ewede meshah kezhegoong ishpeming, chenanahwenahmoowod ewh kezhik *kiya* ewh debik ; chekekenahwahdezelwod dush, ewh aindahsoonebing *kiya* aindahsoo-pepoong, *kiya* aindahsoo-kezheguk, *kiya* aindahsoo-pepoong :

15 Tahwahsayahzewug dush ewede meshah kezhegoong ishpeming, chewahsashkamoowod ewh ahkeh : me dush goo ewh kahezhewabuk.

16 Keshamunedoo dush ooge oozheon neenzh enewh kache wahsahkoonanejin : enewh dush kache wahsahkoonanejin chegahnahwaindahmenid ewh kezhik, enewh dush ween noondosh wahyahsahkoonanejin chegahnahwaindahmenid ewh debik : *kiya* enewh ahnungs ooge oozheon.

17 Ooge bahgedenon dush owh Keshamunedoo ewede meshah kezhegoong ishpeming, chewahsashkoonanid emah ahkeeng.

18 Chegahnahwaindahmenid dush ewh kezhik kiya ewh debik, kiya chenanahwenahmoowod ewh wahsayah kiya ewh pasahkeeshkog: ooge menahwenon dush owh Keshamunedoo.

19 Kahoonahtagooshig dush, kiya kahgahgezhabahwah-guk, me ewh keneewh kezheguk.

20 ¶ Keshamunedoo dush keekedooh, Tahgah emah nebeeng tahahtahyenoowug ahnooj mamahjejig pamah-dezejig, kiya penasewug papahmesajig emah oogedah-kahmig emah meshah kezhegoong ishpeming.

21 Keshamunedoo dush ooge oozheon enewh keche mesahmaigoon, kiya kahkenah enewh pamahdezenejin mamahjenejin, kekeche pahtahyenoowod 'dush emah nebeeng kahoondahdezejig ewh aindahswayahgezewod, kiya waningwegahnejig penasewug aindahswayahgeze-wod: Keshamunedoo dush ooge menahwenon.

22 Keshamunedoo dush ooge shahwanemon, oowh keenod meneweyook sah, kiya meshenooedeyook, mooskenahdooyook dush enewh kechegahmeen, kiya egewh penasewug talmeshenooedewug emah ahkeeng.

23 Kahoonahtagooshig dush, kiya kahgahgezhabahwah-guk, me ewh kenonoo kezheguk.

24 ¶ Keshamunedoo dush keekedooh, Tahgah emah ahkeeng tahoondahdezewug aindahswayahgezewod e-gewh pamahdezejig, ahwahkonug kiya egewh papahmoodajig, kiya egewh ahwaseehyug ahnooj azhweenzoojig: me dush goo ewh kahezhewabuk.

25 Keshamunedoo dush ooge oozheon enewh ahwah-konun ahnooj azhe weenzoojig, kiya kahkenah enewh papahmoodanejin emah ahkeeng ahnooj azhe weenzoo-jig: Keshamunedoo dush ooge menahwenon.

26 ¶ Keshamunedoo dush keekedooh, Tahgah oozhe-ahdah owh eneneh, anaindahgoozeyung, kiya dush goo azhenahgoozeyung ezheahdah: ween dush chedebah-koonod enewh kekoohyun emah kechegahmeeng, kiya enewh penasewun papahmesanejin, kiya enewh ahwah-konun, kiya kahkenah anegookookahmegahnig ewh ah-keh, kiya kahkenah enewh papahmoodanejin emah ah-keeng.

27 Me dash Keshamunedoo keoozheed enewh enene-wun emah oodenaindahgoozewining, emah goo oodezhenahgoozewining owh Keshamunedoo keezhe kezhead dush enewh enenewun kiya enewh equawun.

28 Keshamunedoo dush ooge shahwanemon, Keshamunedoo dush oowh oogenon, Meneweyook sah, kiya meshenooedeyook, kiya mooshkenashkahmook ewh ahkeh, kiya ketegahdahmook: tebahkoonik dush egewh kekoohyug emah kechegahmeeng, kiya egewh penasewug papahmesajig, kiya kahkenah egewh pamahdezejig papahmoodajig emah ahkeeng.

29 ¶ Keshamunedoo dush keekedooh, Enah sah kekemenenim kahkenah enewh nwahkahshkahkin manzhuskoon mahnewungin, ayahgin emah anegookookahmegog ewh ahkeh, kahkenah kiya egewh metigoog mahnwahkoozejig; me sah ewh kaoomejememeyaig.

30 Kahkenah dush ween egewh ahwaseehyug emah ahkeeng, kiya kahkenah egewh penasewug papahmesajig, kiya kahkenah egewh papahmoodajig emah ahkeeng, egewh pemahdezewin kageshkungig, *ninge menog* kahkenah enewh wazhahwahshkoo nwahkahshkahkin manzhuskoon chemejewod: me dush goo ewh kahezhewabuk.

31 Keshamunedoo dush ooge wahbundahnun kahkenah enewh kahoozhetoojin, enah dush, ahpeje ooge menahwenon. Kahoonahgooshig dush, kiya kahgahgezhabahwahguk, me ewh keingoodwahsoo kezheguk.

CHAPTER II.

Me sah dash kekezhechegahdaig ewh ishpeming kiya ewh ahkeh, kiya kahkenah emah ayahjig.

2 Aneneenzhwahsoo kezhegudenig dush keishquah ahnooke owh Keshamunedoo ahnooj kagoo keoozhetood; keahnwashemoonoo dush ewh aneneenzhwahsoo kezhegudenig, kahkenah ween ahnooj kagoo keoozhetood.

3 Ooge shawaindon dush owh Keshamunedoo ewh neenzhwahsoo kezhik, kiya ooge benetoon: me mah ewh

ahpe Kahahnwashemoonood owh Keshamunedoo keah-nookeed, kahkenah ahnooj kagoo keoozhetood.

4 ¶ Me sah mondah kahne ezhe ahyahneka pemahduk enewh ishpeming kiya ewh akkeh ahpe kahgezheche. gahdaig, ahpe ewh kekezheguk keoozhetood owh Tabaniningaid Keshamunedoo ewh ahkeh kiya enewh ishpeming.

5 Kahkenah enewh sahyahgahkenegin emah mahshkoodang chebwah ween ahyog emah ahkeeng, kahkenah kiya enewh nwahkahshkahkin manzhuskoon chebwah mahjeging kah mah mahsheh enahkoonegasegoo. bun owh Tabaniningaid ewh chegemewunenig emah ahkeeng, kah kiya mahsheh ahyahsegoobun owh eneneh kagetegahdung ewh ahkeh.

6 Emah dush ahkeeng keoonje oombeskahinahgud ewh ahwun, kedepahbahwaig dush anegookoodaingwa. mahguk ewh ahkeh.

7 Owh dush Tabaniningaid Keshamunedoo emah weyahgahsaiyewung ewh ahkeh ooge oonje oonahderon enewh enenewun, Kenasaid dush emah oodanegoome-ning ewh pemahdezewineh nasawin ; me dush kahezhe mahje pemahdezewineh oojechogood owh eneneh.

8 ¶ Owh dush Tabaniningaid Keshamunedoo ooge ketegahdon ewh ketegonans emah wahbunoong enahkayáh ewh Eden ; me dush emah kebahgedenod enewh enene- wun kahoozheahjin.

9 Emah dush ahkeeng ooge oonje sahgahkeon owh Tabahningaid Keshamunedoo ahnooj metigoon manwah-bahmenahgoozenejin, kiya wanezheshenejin amoonjig ; kiya owh nebawahkahwineh metig kaoonje kekaindahming ewh wanezheshing kiya ewh majeahyewung.

10 ¶ Sebeh dush kebeme ezhe tegwayah emah Eden. ing chedepahbahwaig ewh ketegonans ; newing dush emah keneh oonje pahpahkategwayah.

11 Ewh dush netum Pison keezhenekahda : me sah ewh ane ezhetegwayog emah anegookookahmegog ewh Havilah *ahkeh*, aindahzhenuk ewh oozahwe-zhooneyah ;

12 Oonezheshin dush ewh oozahwe-zhooneyah emah

ayog ; kiya dush bdellium kiya onyx-ahseeneen ahyah-wun emah.

13 Menahwah dush ewh pazhig sebeh, Gihon keezhenekahda ; me sah goo ewh ane ezhe tegwayog emah anegookakahmegog ewh Ethiopia *ahkeh*.

14 Menahwah dush ewh pazhig sebeh, Hiddekel keezhenekahda : me sah ewh wahbunoong enahkayah azhetegwayog ewede Assyria. Ewh dush ishquoch sebeh me ewh Euphrates.

15 ¶ Owh dush Tabaningaid Keshamunedoo oogeoodahpenon enewh enenewun, kebahgedenod dush emah Eden ketegonansing, chewahwazhetood kiya chegahnawaindung.

16 Owh dush Tabaningaid Keshamunedoo ooge kahgekemon enewh enenewun oowh keenod, Kahkenah ain-dahswahkoozewed egewh metigoog emah ketegonansing, wanepuzh kedahahmwog :

17 Owh sah atah nebwahkahwineh metig kaaonje kekaindahmingebun ewh wanezheshing kiya ewh majeah-yeewung, kahween kegah ahmwahse : ahpe mahween goo kaahmwahwahdwain kagait kegahnib.

18 ¶ Owh dush Tabaningaid Keshamunedoo keeke-doooh, Kahsaah ween oonezhesheshezenoon chenezhekawezid oowh eneneh ; ningah oozhetahmahwah sah enewh kaoo-weej ahgunejin.

19 Emah dush ahkeeng ooge oonje kezheon oowh Tabaningaid Keshamunedoo kahkenah enewh ahwaseehyun emah mahshkoodang, kiya kahkenah enewh penasewun papahmesanejin ; ooge bedahmahwon dush enewh Adam chewahbumod nahmunj kaezhe wahwenahgwain, kahzhe wenod dush goo oowh Adam kahkenah enewh pamah-dezenejin me sah goo ewh kahezhenekahzoowod.

20 Adam dush ooge wenon kahkenah enewh ahwahkonun, kiya enewh penasewun papahmesanejin, kahkenah kiya enewh ahwahseyun emah mahshkoodang ; oowh dush ween Adam kah ahweyah ahyahsebahneen enewh kage ooweej ahgunepahneen.

21 ¶ Owh dush Tabaningaid Keshamunedoo ooge ena-

nemon enewh Adam ewh cheahpahgezekahgoonid ewh poozaingwahmoowin, kenebah dush : pazhig dush enewh oodoopeguneneh ooge oodahpenahmahwon, nayob dush kegahshkewesedood ewh weyos emah kahoondenod.

22 Me dush owh oopegun emah eneneeng kahoondenod owh Tabaningaid Keshamunedoo, kahoonje oozheod enewh equawun, kebedahmahwod dush enewh eneneewun.

23 Adam dush keekedooh, Umbasah dush noongoom oowh ookun nindoookunim, kiya oowh weyos nindooweyosim : Equa sah dush tahezhenekahzooh, eneneeng mah keoondenah.

24 Mesah dush ewh kaoonje nahgahnod owh eneneh enewh oosun kiya enewh oogeen, chewedegamod dush enewh wewun : wenahwah dush *nahyainzh* chepazhig-wahnenig ewh ooweyosewewah.

25 Nahyainzh dush goo pingwahshahgedegwahbun, owh eneneh kiya enewh wewun, kah dush goo mane-sindahzegwahbun.

CHAPTER III.

Owh dush ween kenabig ahwahshema kahgahyaneze-goobun aindahchewod ahnooj egewh ahwaseihyug emah mashkoodang kahoozheahjin owh Tabaningaid Keshamunedoo. Ooge enon dush enewh equawun, Kagait nah, Keshamunedoo ewh keekedooh, Kagooween ahm-wahkagoon aindahswahkoozewod egewh metigoog emah ketegonansing ?

2 Owh dush equa oowh ooge enon enewh kenabigoon, Nindah mejemin sah ween goo azhe menewewod egewh metigoog emah ketegonansing.

3 Owh sah atah azhe menewid owh metig nahwah-yeeeh padahkezood emah ketegonansing, Keshamunedoo keekedooh, Kagooween ahm-wahkagoon, kagooween kiya tongenahkagoon, cheneboosewaig dush nah.

4 Owh dush kenabig ooge enon enewh equawun, Kahgooshahween kagait kedahnebooseem :

5 Ooge-kaindon mah owh Keshamunedoo ewh goo ahpe kezhizhuk amwagwah egewh, me dash goo chebahquahbeyaig, munedoong dash goo cheenaindahgoozeyiga, chekekaindahmaig dash ewh wanezheshing, kiya ewh majeahyeewung.

6 Ahpe dash owh equa wahyahbahmod enewh metigoon oonezheshenid ewh cheahmwahpun, kiya menahwenahgoosenid, kiya ewh chenebwahkong ezhe mesawaindahgoozid owh metig, ooge-oodahpenon dash ewh azhe menewenid, keahmwod dash, kiya dash goo kemnod enewh oonahbamun; kiya-ween dash goo ooge ahmwon.

7 Nahyainzh dash kebahquahbewug, kekekaindahmoowod dash ewh pingwahshahgedewod; ooge mahwundoogwahdahnahwon dash enewh ahnebeshun, me dash enewh kahoogoodahsewahjin.

8 Ooge-noondahwahwon dash pedwa-washenenid enewh Tabaningainejin Keshamunedoon emah ketegonansing, ahpe pagahmahnemahdenig emah kezhegoong: Owh dash Adam kiya enewh wewun, kegahzoowug emah magwa metigookahnenig ewh ketegonans chewahbumegoosegwah dash enewh Tabaningainejin Keshamunedoon.

9 Owh dash Tabaningaid Keshamunedoo oogee undoomon enewh Adam, oowh dash keenod, Ahneende ahyahyun?

10 Oowh dash keekedooh, Ningé noondon sah ewh kedenwawin emah ketegonansing, ningé zagiz dash, ninpingwahshahgid mah; me dash ewh kahoonje kahzooyon.

11 Keekedooh dash, Wanaish owh kahweendahmook ewh pingwahshahgedeyun? ahzhe nah kege ahmwah owh metig, kahgenahahmoonenahbon ewh cheahmwah-sewud?

12 Owh dash eneneh keekedooh, Owh sah equa kahmeenzheyun cheweewejewid, ningé menig enewh emah metigoong kahoondenind, ningé ahmwah dash goo.

13 Owh dash Tabaningaid Keshamunedoo ooge enon

enewh equawun, Wagoonain oowh kahezhe-chegayun ? Owh dash equa keekedooh, owh sah kenabig ninge wahnemig, ninge ahmwah dash goo.

14 Owh dash Tabaningaid Keshamunedoo ooge enon enewh kenabigoon, Keezhe chegayun sah mondah, kegah ahpeje sheengaindahgooz kegahgwahnesahgaindah-gooz anaindahgoozewod ween egewh ahnooj ahwahknug, kiya ahnooj egewh ahwahseihyug emah mahshkoodang ; kemesahdong sah kegah beimoda, weyahgah-saih dash ewh kamejeyun menik kaoogezhegoomewah-nan emah kebemahdezewining :

15 Ningah bahgedenon sah dash ewh sheenganedewin emah nesahwahyeeeh ahyahyaig, kiya emah nesahwah-yeeeh ahyahwod egewh kenejahnesewog ; ween owh oonejahnesun kegahzhahshahgoondebashkog, keen dash ween kegahzhahshahgodoondahnashkahwah.

16 Enewh dash equawun ooge enon, Ningah geche pahtahyenahtoonun sah enewh kegedemahgezewinun kiya enewh kenegeahwahsoowinun ; wesahgaindahmoo-wining sah kegah oonje negeahwus ; kiya dash kegah nahdanemah owh kenahbaim, ween dash goo kegah debahkoonig.

17 Enewh dash Adam ooge enon, kebezindahmahwud sah ewh oodekedoowin owh kewish, keahmwud dash owh emah metigoong *kahoondenind*, kahgenahahmoone-nahbon ween oowh keenenahbon, Kagooween egewh ahmwahkain : kahgwahnesahgaindahgwud sah ewh ah-keh keen ewh keezhechegayun : Kedemahgezewining sah kegah mahmekindon ewh ahkeh ewh menik kaooge-zhegoomewahnhan emah kebemahdezewining ;

18 Kiya dash menasahgahwunzheen kiya munzonah-zhkoon tahbe zahgahkewug emah kedahkeming ; enewh dash nwahkahshkahkin emah mahshkoodang kegah mejenun ;

19 Ahbwazooyun sah emah kedaingwahying kegah oonje ahmwah owh kebahquazhegunim, nahnonzh goo chegewayun emah ahkeeng ; me mah emah kahoondine-

gooyun : keweyahgahsaihyewh mah, me dash goo emah weyahgahsaihying nayob cheezhe kewayun.

20 Adam dash ooge wenon enewh wewun, Eve dash ooge ezenekahnon ; me mah enewh wagewahjin kahkenah egewh pamahdezejig.

21 ¶ Owh dash Tabaningaid Keshamunedoo pahsh-quagenoo pahpeenzekahwahgunun ooge oozhetahmah-won enewh Adam kiya enewh wewun, keahgweod dash.

22 ¶ Owh dash Tabaningaid Keshamunedoo keeke-dooth, Enah sah, owh eneneh anaindahgoozeyung enain-dahgoozeh, kekaindung dash ewh wanazheshing kiya ewh majeahyeebung : noongoom sah dash, cheoodahpenahsig enewh pemahdezwineh metigoong ayahjig, kahgenig dash chebemahdezepun.

23 Me dash owh Tabaningaid Keshamunedoo kahezhe zahgejenahzhahwod emah ketegonansing ewh Eden, chegetegahdung dash ewh ahkeh kiya ween emah ka-hoondenind.

24 Mesah dash kahezhe zahgejenahzhahwod enewh enenewun ; ooge nebahweon dash enewh *ishpeming tahzhe* Minzhenahwain wahbunoong enahkayah emah ketegonansing ewh Eden, kiya ewh masquahkoonaig ahzhahwaishk kewetahahyeech kahezhe quaquakahbe-kesaig, cheahkahwahbundahmoowod ewh mekun pondégamoog emah ahyod owh pemahdezwineh metig.

THE FIRST BOOK OF MOSES,
CALLED,
GENESIS.



TORONTO:

TRANSLATED BY P. JONES, FOR THE AUXILIARY BIBLE SOCIETY.

GUARDIAN OFFICE.—J. H. LAWRENCE, PRINTER.

1835.